

摘藻堂四庫全書薈要

集部

欽定四庫全書薈要卷一萬八千九百六十集部

御定佩文齋詠物詩選卷三百三十八

芍藥花類

五言古

直中書省

齊謝朓

紫殿肅陰陰彤庭赫弘敞風動萬年枝日華承露掌玲瓏結綺錢深沈映朱網紅藥當堦翻蒼苔依砌上茲言翔鳳池鳴珮多清響信美非吾室中園思偃仰朋情以

鬱陶春物方駘蕩安得凌風翰聊恣山泉賞

戲題堦前芍藥

唐柳宗元

凡卉與時謝妍華麗茲晨歆紅醉濃露窈窕留餘春孤
賞白日暮暄風動搖頻夜窗藹芳氣幽卧知相親願致
溱洧贈悠悠南國人

紅芍藥

唐元稹

芍藥綻紅綃芭籬織青瑣繁絲蹙金蘂高燄當爐火剪
刻彤雲片開張赤霞褰煙輕琉璃葉風亞珊瑚朶受露

色低迷向人嬌婀娜
酡顏醉後並小女妝
成坐豔豔錦不如天
天桃未可晴霞畏欲
散晚日愁將墮結植
本為誰賞心期在我
采之諒多思幽贈何
由果

七言古

新安芍藥歌送胡伯恭之婺源

元
袁
桷

洛陽花枝如美人點
點不受塵土嗔輕紅
深白鑄顏色高亞綠
樹爭精神那如新安
紅芍藥透日千層光
閃爍

碧雲迸出紫瑠璃風動霓裳凝綽約我聞種花如種玉
盡日陰晴看不足微雲淡蕩增寵光細雨輕濛賜湯沐
何人看花不解理香雪紛紛手中毀酒酣跌宕空低昂
得意須臾竟如此翩翩驕驥雲中君愛花直欲留青春
青春如流欲歸去明年看花君合住

五言律

芍藥

唐

張九齡

仙禁生紅藥微芳不自持幸因清切地還遇艷陽時名

見桐君錄香聞鄭國詩孤根若可用非直愛華滋

蘇子川宅觀芍藥

明
黎民表

為掩羣芳色
開花獨後時
青扶承露藥
紅安出闌枝
綽約東隣子
風流鄭國詩
合歡還有恨
名字是將離

芍藥

明
睦石

春色今方滿
名花爾較遲
含芳如有意
呈彩亦當時
調鼎需仙液
揮毫停鳳池
天工知不淺
一夜露華滋

五言排律

草詞畢遇芍藥初開因詠小謝紅藥當階翻詩
以為一句未盡其狀偶成十六韻

唐

白居易

罷草紫泥詔起吟紅藥詩詞頭封送後花口坼開時坐
對鉤簾久行觀步履遲兩三叢爛熳十二葉參差背日
房微斂當階朶旋欹釵萼抽碧股粉藥撲黃絲動蕩情
無限低斜力不支周迴看未足比喻語難為勾漏丹砂
畏焦僥火燄旗彤雲賸根蒂絳幘欠纓綏況有晴風度

仍兼宿露垂凝香熏罨畫似淚著胭脂有意流連我無
言怨思誰應愁明日落如恨隔年期菡萏泥連萼玫瑰
刺繞枝等量無勝者惟眼與心知

七言律

芍藥

宋
王禹偁

東君留著占殘春得得遲開亦有因曾與掖垣留故事
又來淮海伴詞臣日燒紅豔排千朶風遞清香滿四鄰
更愛綠頭弄金縷異時相對掌絲綸

其二

滿院勻開似赤城帝鄉齊點上元燈感傷綸閣多情客
珍重維揚好事僧酌處酒杯深蘸甲折來花朵細含稜
老郎為郡辜朝寄除却吟詩百不能

北第同賞芍藥

宋韓琦

芍藥名高致亦難此觀妖豔滿雕闌酒酣誰欲張珠網

醉西施

金細偏宜間寶冠

金線冠子

露裊更深雲髻重

髻子

蝶棲長苦

玉樓寒

樓子

鄭詩已取相持贈不見諸經載牡丹

玉盤盃

宋 蘇軾

雜花狼籍占春餘，芍藥開時掃地無。
兩寺妝成寶璣珞，一枝爭看玉盤盃。
佳名會作新翻曲，絕品難尋舊畫圖。
從此定知年穀熟，姑山親見雪肌膚。

彭孝求以綠野行送芍藥數種鄙句為謝

宋 周必大

占斷春光及夏初，瑠璃剪葉朶珊瑚。
休論花品同而異，共詠詩人樂且訐。
北第莫辭金鑿落，南禪爭看玉盤盃。

彭宣微恙何妨醉自有嬌癡婢子扶

多稼亭前兩檻芍藥紅白對開二百朵

宋
楊萬里

紅紅白白定誰先
媚媚娉娉各自妍
最是倚欄嬌分外
却緣經雨意醒然
晚春早夏渾無伴
暖豔晴香正可憐
好為花王作花相
不應只遣侍甘泉

論花者牡丹
王芍藥近侍

芍藥

元
郝經

夜來風雨洗殘春
芍藥還開春又新
入座忽驚持酒客

舉杯先酌送花人
煙輕雪膩丰容質
露重霞香婀娜身

鐵石肝腸總銷鑠
却將軟語說風神

王承宣送揚州芍藥數本

王叔能宅芍藥

元馬祖常

鶯粉分奩豔有光
天工巧製殿春陽
霞縵縈縈積雲千疊
寶盞凝脂蜜半香
並蒂當階盤綬帶
金苞向日剖珠囊
詩人莫詠揚州紫
便與花王可頡頏

陪宴相府得芍藥花有感賦

元張昱

醉吐車茵愧不才
馬前蝴蝶趁花回
玉鉶盛露扶春起

錦帳圍燈照夜開
垂白敢思溱洧贈歌紅
還是廟廊栽
揚州何遜空才思
惟對高寒詠閣梅

芍藥

明吳寬

品高真自廣陵來
舊譜空餘壁角堆
千葉連雲如並擁
兩枝迎日忽齊開
詩中相謔何須贈
擔上能賒也用栽
記取今年纔看起
醉吟多藉麴生材

五言絕句

芍藥

金姚孝錫

綠萼披風瘦紅苞泥露肥只愁春夢斷化作彩雲飛

七言絕句

芍藥

唐韓愈

浩態狂香昔未逢紅燈爍爍綠盤龍覺來獨對情驚恐
身在仙宮第幾重

芍藥

宋蘇軾

倚竹佳人翠袖長天寒猶著薄羅裳揚州近日紅千葉
自是風流時世妝

謝趙生惠芍藥

宋 陳師道

九十風光次第分
天憐獨得殿殘春
一枝賸欲簪雙髻
未有人間第一人

過廣陵值早春

宋 黃庭堅

春風十里珠簾捲
彷彿三生杜牧之
紅藥梢頭初顰栗
揚州風動鬢成絲

五月芍藥

元 馬祖常

紅芍花開端午時
江南遊客苦相疑
上京不是春光晚

自是人家日景遲

灤京雜詠

元 楊允孚

東風已肯到天涯
燕子飛來相國家
若較內園紅芍藥
洛陽輸却牡丹花

內園芍藥迷望亭亭直上數尺許花大如斗揚州芍藥稱第一終不及上京也

其二

時雨初肥芍藥苗
脆甘味壓酒腸消
揚州簾卷東風裏

曾惜名花第一嬌

草地芍藥初生軟美居人多採食之

芍藥

明 高 啟

昔年花發要人催
今日人稀花自開
獨有園丁憐國色
時容閒客借看來

題芍藥

明僧德祥

玉階宜有此花開
金鼎調香宰相才
莫謂人間無彩筆
寫將穠豔入雲臺

御定佩文齋詠物詩選卷三百三十八

欽定四庫全書薈要卷一萬八千九百六十一集部

御定佩文齋詠物詩選卷三百三十九

瑞香花類

五言古

次韻曹子方龍山真覺院瑞香花

宋蘇軾

幽香結淺紫來自孤雲岑
骨香不自知色淺意殊深
移栽青蓮宇遂冠薜蘿林
紐為楚臣佩散落天女襟
君持

風霜節耳冷歌笑音一逢蘭蕙質稍回鐵石心置酒要
妍暖養花須晏陰及此陰晴間恐致慳嗇霖絲雲知易
散鶗鴂憂先吟明朝便陳迹試著丹青臨

次韻錢倅諸公瑞香花

宋陳造

鈎窗翫孤芳殘月衣上明紫囊坼蘭麝小風弄初晴
長短句

瑞香花詩

明宣宗

瑞香花葉如織其葉非一狀花開亦殊色或如瑪瑙之

殷紅或如玉雪之姿容或含淺絳或深紫細蕊疊疊芬
玲瓏臘後春前花未放先春獨占梅花上繞枝芳意露
毵毵萬卉千葩總相讓瞳矐旭日照階墀蕩香風拂
面時初疑沈檀爇寶鼎亦似蘭麝熏人衣瑞香花樹高
三尺強山杏野桃動踰丈得似幽叢約馥香

五言律

瑞香花

宋
楊萬里

外著朝霞綺中栽淡玉紗森森千萬筍旋旋兩三花小

霽迎風喜輕寒索幙遮香中真上瑞蘭麝敢名家

其二

短短熏籠小團團錦帕圍浮陽烘酒思沈水著人衣
茉莉通家遠椒花具體微春愁渾瘦盡別有瘦中肥

七言律

次韻楊廷秀待制瑞香花

宋周必大

灞橋忍凍兩相攢漢殿含香別一般粉面故宜垂紫袖
錦裳何必著中禪禁庭侍史今同宿宮帽花枝故自藥

咀嚼新詩懷舊直刺貪寧不媿河檀

瑞香花

宋 楊萬里

侵雪開花雪不侵開時色淺未開深碧團圞裏筍成束
紫蓓蕾中香滿襟別派近傳廬阜頂孤芳元自洞庭心
詩人自有熏籠錦不用衣篝炷水沈

瑞香花

宋 朱淑真

玲瓏巧蹙紫羅裳合得東君著意妝帶露破開宜曉日
臨風微困却春霜發揮名字來廬阜彈壓芳菲入醉鄉

最是午窗初睡醒
重重贏得夢魂香

五言絕句

瑞香花

宋

王十朋

真是花中瑞
本朝名始聞
江南一夢後
天下仰清芬

七言絕句

瑞香花

宋

楊萬里

織錦天孫矮
作機紫茸翻
了白花枝
更將沈水濃熏却
日淡風微欲午時

瑞香花

宋 闕名

盧阜當年春睡濃
花名從此擅春工
紫葩四迸呈鮮粉
如蕪仙香透錦籠

其二

拏花簇粉烘晴日
藹有濃香透遠風
六曲闌干凝睇處
錦籠真似玉為籠

瑞香花

元 楊維禎

一團華蓋翠亭亭
萬箇丁香露欲零
日炙錦熏眠不得

玉人扶起酒初醒

御定佩文齋詠物詩選卷三百三十九

欽定四庫全書薈要卷一萬八千九百六十二

集部

御定佩文齋詠物詩選卷三百四十

木芙蓉類

五言古

芙蓉亭

唐

柳宗元

新亭俯朱檻嘉木開芙蓉清香晨風遠縹彩寒露濃
灑出人世低昂多異容嘗聞色空喻造物誰為工
留連秋月晏迢遞來山鐘

湘岸移木芙蓉植龍興精舍
柳宗元

有美不自蔽安能守孤根
盈盈湘西岸秋至風露繁
麗影別寒水穠芳委前軒
芰荷諒難雜反此生高原

芙蓉

元
朱德潤

夾城遺芳栽搖落及千年
芙蓉發靚妝絕豔秋江邊
臨風拂羅幃紅裳擁三千
素抱拒霜質亭亭赤城仙
曾攜一枝去生綃記餘妍

五言律

木芙蓉

唐韓愈

新開寒露叢遠比水間紅
豔色寧相妬嘉名偶自同
採江官渡晚寒木古祠空
願得勤來看無令便逐風

芙蓉

明申時行

羣芳搖落後秋色在林塘
豔態偏臨水幽姿獨拒霜
漢臯霞作佩湘曲錦為裳
白首滄江上相看醉夕陽

七言律

木芙蓉

唐劉兼

素靈失律詐風流強把芳菲半載偷是葉歲蕤霜照夜
此花爛熳火燒秋謝蓮色淡爭堪種陶菊香濃亦合羞
誰道金風能肅物因何厚薄不相侔

題殷舍人宅木芙蓉

宋 徐鉉

憐君庭下木芙蓉嫋嫋纖枝淡淡紅曉吐芳心零宿露
晚搖嬌影媚清風似含情態愁秋雨暗減馨香借菊叢
默飲數杯應未稱不知歌管與誰同

次韻寄題芙蓉館

宋 朱子

不須艇子棹歌來，且看芙蓉面面開。
卷裏有詩都錦繡，席間無地可塵埃。
風清月白琴三弄，綠暗紅深酒一杯。
明日仲宣樓上去，越吟應是首頻回。

拒霜花

宋楊萬里

木蕖何似水芙蓉，同箇聲名各自都。
風露商量借膏沐，胭脂深淺入肌膚。
喚回春色秋光裏，饒得紅妝翠蓋無。
字曰拒霜，渾不惡，却愁霜重要人扶。

木芙蓉

宋方岳

綠裳紅臉水仙容不謂佳名偶自同一朶方酣初日色
千枝應發去年叢莫驚墜落添新紫更待微霜暈淺紅
却笑牡丹猶淺俗但將濃豔醉春風

紅芙蓉

元
蒲道源

豐肌弱骨與秋宜宿酒酣來不自持豈為嚴霜成槁質
要憑初日發妍姿燕姬入畫猶嫌陋蜀錦團窠未足奇
獨對芳叢寄幽興子高真是遇仙時

轉觀芙蓉

蒲道源

露涼風冷見溫柔誰挽春還九月秋午醉未醒全帶豔
晨妝初罷尚含羞未甘白紵居寒素也著緋衣入品流
若信牡丹南面貴此花應合是封侯

次韻薩天錫臺郎賦三益堂芙蓉

元
僧大訢

花間未覺早霜殘留伴仙人酒半闌翡翠巢空秋浦淨
落霞飛盡暮江寒玉真對月啼雙頰楚袖迎風舞七盤
持向毘耶聽說法老翁原作色空看

五言絕句

辛夷塢

唐王維

木末芙蓉花山中發紅萼澗戶寂無人紛紛開且落

木芙蓉

宋朱子

紅芳曉露濃綠樹秋風冷共喜巧回春不妨閒弄影

拒霜

宋楊萬里

染露金風裏宜霜玉水濱莫嫌開最晚元自不爭春

芙蓉

明蔣忠

清露下林塘波光淨如洗中有弄珠人盈盈隔秋水

七言絕句

木芙蓉花下招客飲

唐白居易

晚涼思飲兩三盃召得江頭酒客來莫怕秋無伴醉物
水蓮開盡木蓮開

芙蓉

唐高蟾

天上碧桃和露種日邊紅杏倚雲栽芙蓉生在秋江上
不向東風怨後開

木芙蓉

唐
黃滔

黃鳥啼煙二月朝
若教開即牡丹饒
天嫌青帝恩光盛
留與秋風雪寂寥

其二

却假青腰女剪成
綠羅囊綻彩霞呈
誰憐不及黃花菊
只遇陶潛便得名

芙蓉

宋
歐陽修

種處雪消春始凍
開時霜落雁初過
誰栽金菊叢相近

織出新番蜀錦窠

和陳述古拒霜花

宋蘇軾

千林掃作一番黃，只有芙蓉獨自芳。
喚作拒霜知未稱，細思却是最宜霜。

拒霜

宋劉珪

翠幄臨流結絳囊，多情常伴菊花芳。
誰憐冷落清秋後，能把柔姿獨拒霜。

芙蓉

宋劉克莊

湖上秋風起棹歌萬株映柳更依荷老來不作繁華夢
一樹池邊已覺多

其二

池上秋開一兩叢未妨冷淡伴詩翁而今縱有看花意
不愛深紅愛淺紅

維揚花園

宋
宋伯仁

細柳營基瑣綠苔萬花新種小亭臺芙蓉喜見江南客
故向西風一夜開

錢舜舉折枝芙蓉

元虞集

白髮多情憶劒南
秋風谿上看春酣
剪來一尺吳江水
擬比千花濯錦潭

木芙蓉

虞集

九月襄王宴渚宮
霓旌翠羽度雲中
滿汀山雨衣裳濕
宋玉愁多賦未工

題倪元鎮畫

元陳基

西池亭館帶芙蓉
雲水蒼茫一萬重
此日畫圖看不足


滿簾秋雨夢吳淞

題畫

明
吳孺子

玉露凌寒萬壑空
洞庭秋水醉芙蓉
小舟不放尋詩夢
撐入邨南卧晚風

御定佩文齋詠物詩選卷三百四十



總校官庶吉士臣侍朝

校對官修撰臣張書勳

校對官檢討臣王坦修

謄錄舉人臣杜安詩

謄錄監生臣李溥

欽定四庫全書薈要

集部

御定詠物詩選卷三百

四十一至
五十三

詳校官原任主事
臣李斯咏

欽定四庫全書薈要卷一萬八千九百六十三

集部

御定佩文齋詠物詩選卷三百四十一

茉莉花類

七言古

次韻胡元甫茉莉花

宋樓鑰

殘暑未盡秋欲來
玉刻萬葉瓊英開
孤標雅韻一枝足
江上紫翠空成堆
素娥常與明月約
青女細把輕綃裁
主人好事趁時買
買實此地真宜哉
牆間閒地方丈所

幾年累甃裝層臺春花秋卉方互發蜀葵芍藥叅徘徊
眼明忽見此奇絕第蓄素馨兄事梅夜深飛香性幽獨
未許蜂蝶來相陪糖甃封餘有閩玉會須掃取添花栽
吾聞閩山千萬木人或視此齊蒿萊何如航海上天闕
玉色照映琉璃杯新涼徙倚看不足坐見日影歆庭槐

茉莉

宋
楊萬里

江梅去去木樨晚芝草石榴刺人眼唯有茉莉幽更佳
龍涎避香雪避花朝來無熱夜涼甚急走山僮問花信

一枝帶雨折來歸走送詩人覓好詩

五言律

茉莉

宋

劉子翬

翠葉光如沃冰葩淡不妝一番秋早秀徹日坐傍香色
照祇園淨清回瘴海涼倘堪紉作佩老子欲浮湘

茉莉

宋

朱子

曠然塵慮盡為對夕花明密葉低層幄冰蕤亂玉英不
因秋露濕詎識此香清預恐芳菲盡微吟繞砌行

奉酬圭父茉莉之作

朱子

玉蘂琅玕樹天香知見薰露寒清透骨風定遠含芬爽
致消煩暑高情謝曉雲遙憐河朔飲那得醉時聞

五言絕句

題茉莉

明
皇甫汈

萼密聊承葉藤輕易繞枝素華堪飾鬢爭趁晚妝時

其二

香慣臨風細花偏映日生若將人試擬小玉定齊名

七言絕句

茉莉

宋
葉廷珪

露華洗出通身白
沈水薰成換骨香
近說根苗移上苑
休慙系出本南荒

宮詞

明
朱有燾

屏掩春山夜漸長
秋來處處有新涼
一天明月星河淡
滿殿風吹茉莉香

茉莉

明
趙福元

刻玉雕瓊作小葩清姿原不受鉛華西風偷得餘香去
分與秋城無限花

宮詞

明
仲春龍

海子周遭長荻芽春深乘艫不乘車阿誰貪看游魚戲
拋却新簪茉莉花

茉莉詞

明
王穉登

贛州船子兩頭尖茉莉初來價便添公子豪華錢不惜
買花只揀樹齊簷

其二

賣花僮父笑吳兒一本千錢亦太癡
儂在廣州城裏住家家茉莉盡編籬

其三

章江茉莉貢江蘭夾竹桃花不耐寒
三種盡非吳地產一年一度買來看

茉莉花

明沈宜修

如許閒宵似廣寒翠叢倒影浸冰團
梅花宜冷君宜熱

一樣香魂兩樣香

御定佩文齋詠物詩選卷三百四十一

欽定四庫全書薈要卷一萬八千九百六十四

集部

御定佩文齋詠物詩選卷三百四十二

夾竹桃花類

五言古

弋陽縣學北堂見夾竹桃花有感而書

宋
李觀

暖碧覆晴殷依依近朱欄異類偶相合勁節何能安同
時盡妖豔無地容檀欒移根旣不可潔心誠為難外貌

任春色中心期歲寒正聲尚可聽誰是伶倫官

五言律

夾竹桃花

明 王世懋

名花踰嶺至婀娜自成陰不分芳春色猶餘晚歲心絳
分疎翠小青入嫩紅深本識仙源種無妨共入林

其二

何來武陵色移植向深閨葉不迎秋墮花仍入夏齊菲
菲能拂石冉冉敢成蹊尚挾風霜氣流鶯未敢棲

--	--	--	--	--	--	--	--

御定佩文齋詠物詩選卷三百四十二

欽定四庫全書薈要卷一萬八千九百六十五

集部

御定佩文齋詠物詩選卷三百四十三

薔薇花類

五言古

詠薔薇

齊謝朓

低枝詎勝葉輕香幸自通發萼初攢紫餘采尚霏紅新
花對白日故藥逐行風參差不俱曜誰肯盼微叢

詠薔薇

梁簡文帝

燕來枝益軟風飄花轉光氤氲不肯去還來階上香

詠薔薇

梁柳惲

當戶種薔薇枝葉太歲蕤不搖香已亂無風花自飛
春閨不能靜開匣理明妃曲池浮采采斜岸列依依
或聞好音度時見銜泥歸且對清醑湛其餘任是非

看美人摘薔薇

梁劉綏

新花臨曲池佳麗復相隨鮮紅同映水輕香共逐吹
繞架尋多處窺叢見好枝矜新猶恨少將故復嫌萎
釵邊

爛漫插何處不相宜

詠薔薇

梁鮑泉

經植宜春館
霍靡上蘭宮
片舒猶帶紫
半卷未全紅
葉疎難蔽日
花密易傷風
佳麗新妝罷
含笑折芳叢

邀人賞薔薇

唐孟郊

蜀色庶可比
楚叢亦應無
醉紅不自力
狂豔如索扶
麗藥惜未掃
宛枝長更紆
何人是花侯
詩老強相呼

薔薇洞

明顧璘

百丈薔薇枝繚繞成洞房密葉翠帷重穠花紅錦張對
著玉局碁遣此朱夏長香雲落衣袂一月留餘芳

七言古

薔薇篇

唐
儲光義

裊裊長數尋青青不作林一莖獨秀當庭心數枝分作
滿庭陰春日遲遲欲將半庭影離離正堪翫枝上嬌鶯
不畏人葉底飛蛾自相亂秦家女兒愛芳菲畫眉相伴
採葳蕤高處紅鬚欲就手低邊綠刺已牽衣蒲桃架上

朝光滿楊柳園中暝鳥飛連袂踏歌從此去風吹香氣
逐人歸

和薔薇花歌

唐孟郊

仙機軋軋織鳳皇花開七十有二行天霞落地攢紅光
風枝嫋嫋時一颺飛散葩馥繞空王忽驚錦浪洗新色
又似宮娥逞妝飾終當一使移花根還比蒲桃天上植
五言律

題薔薇花

唐朱慶餘

四面重條密浮雲入夏清綠攢傷手刺紅墮斷腸英粉
著蜂鬚膩光凝蝶翅明雨中看亦好況復值初晴

紅薇

唐李咸用

春雨有五色灑來花旋成欲留池上景別染草中英
畫出看還欠蓮為插未輕王孫多好事攜酒寄吟傾

僧院薔薇

李咸用

客引擎茶看離披曬錦紅不緣開淨域爭忍負春風
小片當吟落清香入定空何人來此植應固惱休公

五言排律

薔薇花聯句

裴白
劉

唐

張籍

似錦如霞色連春接夏開

禹錫

波紅分影入風好帶香來

度得地依東閣當階奉上台

行式

淺深皆有態次第暗相

催

禹錫

滿地愁英落緣堤惜棹回

度

芳濃濡雨露明麗隔

塵埃

行式

似著胭脂染如經巧婦裁

居易

奈花無別計只有

酒殘杯

籍

裴常侍以題薔薇架十八韻見示因廣為三十

韻以和之

唐白居易

託質依高架，攢華對小堂。
晚開春去後，獨秀院中央。
霽景朱明早，芳時白晝長。
穠因天與色，麗共日爭光。
剪碧排千萼，研朱染萬房。
煙條塗石綠，粉藥撲雌黃。
根動形雲涌，枝搖赤羽翔。
九微燈炫轉，七寶帳熒煌。
淑氣熏行徑，清陰接步廊。
照梁迷藻梲，耀壁變雕牆。
爛若聚然火，殷於葉得霜。
臙脂含笑臉，蘇合裛衣香。
浹濡晨露玲瓏漏，交陽合羅排勘顙。
醉暈淺深妝乍見，疑迴面遙看。

誤斷腸風朝舞飛燕雨夜泣蕭娘桃李慙無語芝蘭讓
不芳山榴何細碎石竹苦尋常蕙慘偎欄避蓮羞映浦
藏怯教蕉葉戰妬得柳花狂豈可輕嘲詠應須痛比方
畫屏風自展繡織蓋誰張翠錦挑成字丹砂印著行猩
猩凝血點瑟瑟蹙金圭散亂菱紅片尖纖嫩紫芒觸僧
飄毳褐留妓冒羅裳寡和陽春曲多情騎省郎緣誇美
顏色引出好文章東顧辭仁里西歸入帝鄉假如君愛
煞留著莫移將

寒食日沙縣雨中看薔薇

唐韓偓

何處遇薔薇殊鄉冷節時雨聲籠錦帳風勢偃羅帷通
體全無力酡顏不自持綠疎微露刺紅密欲藏枝愜意
憑欄久貪吟放盞遲旁人應見訝自醉自題詩

依韻和令公大王薔薇詩

宋徐鉉

綠樹成陰後羣芳稍歇時誰將新濯錦挂向最長枝卷
箔香先入凭欄影任移賞頻嫌酒渴吟苦怕霜髭架迴
籠雲幄庭虛展繡帷有情縈舞袖無力冒游絲嫩藥鶯

偷采柔條柳伴垂
荀池波自照梁苑客嘗窺
玉李尋皆謝金桃亦暗衰
花中應獨貴庭下故開遲
委豔妝苔砌分華借
槿籬低昂勻灼爍濃淡疊
參差幸植王宮裏仍逢宰府知
芳心向誰許醉態不能支
芍藥天教避玫瑰衆共嗤
光明烘晝景潤膩裛輕霽
麗似期神女珍如重衛姬
君王偏屬詠士子盡搜奇

七言律

城上薔薇

唐李紳

薔薇繁豔滿城陰
爛熳開紅次第深
新藥度香翻宿蝶
密房飄影戲晨禽
竇閨織婦慚詩句
南國佳人怨錦衾
風月寂寥思往事
暮春空賦白頭吟

薔薇正開春酒初熟
因招劉十九張大夫崔二

十四同飲

唐白居易

甕頭竹葉經春熟
階底薔薇入夏開
似火淺深紅壓架
如飴氣味綠粘臺
試將詩句相招去
倘有風情或可來
明日早花應更好
心期同醉卯時杯

朱秀才庭際薔薇

唐方干

繡難相似畫難真
明媚鮮妍絕比倫
露壓盤條方到地
風吹豔色欲燒春
斷霞轉影侵西壁
濃麝分香入四鄰
看取後時歸故里
庭花應讓錦衣新

和薔薇次韻

唐皮日休

誰繡連延滿戶陳
暫應遮得陸郎貧
紅芳掩斂將迷蝶
翠蔓飄飄欲挂人
低拂地時如墮馬
高臨牆處似窺鄰
祇應是董雙成戲
剪得神霞寸寸新

李太舍池上翫紅薇醉題

唐韓偓

花低池小水平平
花落池心片片輕
酩酊不能羞白鬢
顛狂猶自睨紅英
乍為旅客顏常厚
每見同人眼暫明
京洛林園歸未得
天涯相顧一含情

薔薇

唐李建勳

萬藥爭開照檻光
詩家何物可相方
錦江風撼雲霞碎
仙子衣飄黼黻香
裊露早英濃壓架
背人狂蔓暗穿牆
綵牋蠻榼旬休日
欲召親賓看一場

李少卿宅薔薇

明王韋

柔香弱蔓不勝寒
十二圍屏錦繡攢
秦殿曉妝俱窈窕
習家春事未闌珊
憐將清奏愁中聽
競折高枝醉後看
好待詩成酬勝賞
東風休遣露華乾

五言絕句

薔薇下

明魯鐸

獨酌薔薇下
花陰亂午風
有時殘露滴
剛著酒杯中

七言絕句

戲題盧秘書新移薔薇

唐白居易

風動翠條腰嫋娜露垂紅萼淚闌干移他到此須為主
不愛花人莫使看

薔薇花

唐張祜

曉風抹盡胭脂顰夜雨催成蜀錦機當畫開時正明媚
故鄉疑是買臣歸

薔薇花

唐杜牧

朶朶精神葉葉稠雨晴香拂醉人頭石家錦障依然在

閒倚狂風夜未收

重題薔薇

唐皮日休

濃似猩猩初染素輕於燕燕欲凌空
可憐細麗難勝日照得深紅作淺紅

紅薔薇

唐牛嶠

曉啼珠露渾無力繡簇羅襦不著行
若綴壽陽公主額六宮爭肯學梅妝

薔薇

唐徐夔

朝露灑時如濯錦晚風飄處似遺鈿
重門刺著黃金鎖
莫被飛瓊摘上天

紅薔薇花

唐僧齊已

晴日當樓曉香歇錦帶盤空欲成結
鶯聲漸老柳飛時
狂風吹盡猩猩血

閒遊

宋陸游

好事湖邊賣酒家杖頭錢盡慣曾賒
墟邊爛醉眠經日
開過紅薇一架花

湖城簿廳

金吳激

日遲風暖燕飛飛
古柳高槐面翠微
卷上疎簾無一事
滿池春水照薔薇

草萍驛和薩天錫

元盧琦

林外輕風帽影斜
客衣近染紫山霞
等閒點檢春多少
牆角薔薇幾樹花

御定佩文齋詠物詩選卷三百四十三

欽定四庫全書薈要卷一萬八千九百六十六

集部

御定佩文齋詠物詩選卷三百四十四

月季花類

五言古

月季花

宋
宋 祁

羣花各分榮此花貫時序聊披深淺豔不易冬春慮真
寄竟何言予將造形悟

次韻子由月季花再生

宋
蘇 軾

幽芳本長春暫瘁如蝕月且當付造物未易料枯枿也
知宿根深便作紫筍茁乘時出婉婉為我暖栗烈先生
早貴重廟論推英拔而今城東瓜不記召南茨陋居有
遠寄小圃無闊躡還為久處計坐待行年匝臘果綴梅
枝春杯浮竹葉誰言一萌動已覺萬木活聊將玉蘂新
插向綸巾折

五言律

月季花

明
劉繪

綠刺含煙鬱紅苞逐月開
朝華抽曲沼夕榮壓芳臺
能鬪霜前菊還迎雪裏梅
蹋歌春岸上幾度醉金杯

七言律

月季花翠雀

明
申時行

奇葩競吐漢宮春日日含香
送紫宸千葉能隨萸莢茂
四時常應桂輪新乍疑勝裏
金花巧却訝枝間翠鳳馴
願以長春歌聖壽還將解網
頌皇仁

七言絕句

月季花

宋韓琦

牡丹殊絕委春風
露菊蕭疎怨晚叢
何似此花榮豔足
四時長放淺深紅

月季花

明張新

一番花信一番新
半屬東風半屬塵
惟有此花開不厭
一年長占四時春

欽定四庫全書薈要卷一萬八千九百六十七

集部

御定佩文齋詠物詩選卷三百四十五

刺桐花類

七言絕句

小雪日戲題

唐張登

甲子徒推小雪天
刺桐猶綠槿花然
陽和長養無時歇
却是炎洲雨露偏

泉州刺桐花詠兼呈趙使君

唐陳陶

海曲春深滿郡霞
越人多種刺桐花
可憐虎竹西樓色
錦帳三千阿母家

其二

猗猗小豔夾通衢
晴日薰風笑越姝
只是紅芳移不得
刺桐屏障滿中都

其三

赤帝嘗聞海上遊
三千幢蓋擁炎洲
今來樹似離宮色
紅翠歌斜十二樓

其四

髣髴三株植世間
風光滿地赤城間
無因秉燭看奇樹
長伴劉公醉玉山

永春路

宋徐璣

路行僻處山山好
春到晴時物物嘉
秀色連雲原上麥
清香夾道刺桐花

舟行青谿道中入歙

元方回

刺桐花發草如藍
欲卸綿袍剪紵衫
一夜春霜忽如雪

江南天氣不宜蠶

書武陽驛

明 汪應軫

小驛春深屋半斜
東風開到刺桐花
夜來有夢難分別
半是長安半是家

送金員外歸泉南

明 僧來復

朱樓別起擁飛霞
浮石橋邊久住家
海日浴紅春雨霽
鷓鴣啼上刺桐花

西湖雜詩

僧來復

芙蓉灣口綠陰斜吹笛何人隔彩霞驚起沙頭雙翠羽
銜魚飛上刺桐花

御定佩文齋詠物詩選卷三百四十五

欽定四庫全書薈要卷一萬八千九百六十八

集部

御定佩文齋詠物詩選卷三百四十六

酴醾花類

五言古

杜沂遊武昌以酴醾花見餉

宋

蘇軾

酴醾不爭春寂寞開最晚青蛟走玉骨羽蓋蒙珠幃不
粧艷已絕無風香自遠當時吳宮闕紅粉埋故苑至今
微月夜笙簫來翠巘餘妍入此花千載尚清婉怪君呼

不歸定為花所挽
昨宵雷雨惡
花盡君應返

酴醾架

元貢奎

西園檢春事
積雨斷餘紅
酴醾壓高架
皎皎晚日烘翠
蔓點殘雪清
香度微風
幽人對之坐
瑩然此心同
徘徊不忍去
片月來高空
宛如萬玉娥
素袖舞雲中
珠璣露顚綴
翠珮煙光籠
愛花不愛折
枝柔刺盈叢
携酒醉其下
慰此良夜終

刺蘼

明吳寬

酴醾有數種同名而異字花開欲折難鉤如棘刺白
者榦獨長紅者香更膩種之小徑傍所恨罽衣袂揷竹
加編縛步障差可類石家金谷園恐乏此佳致

七言古

失題

宋
盧元贊

初疑廣寒修月手釀此欲作長春酒又疑青女未歸家
搏香弄粉為此花要知風韻太超絕清影亭亭半遮月
微風不動香更繁沈水未灰金博山我來已落春去後

尚覺有香棲鼻端年年欲占餘春住早開却被媽紅妬
從今著意問春工借與姮娥奔月路

和羅武岡酴醾長句

宋 楊萬里

花飛十不啻五六青子團枝失紅簇江南桃李總成陰
不論少城與韋曲酴醾珍重不浪開晚堆綠雲點冰玉
體熏山麝非一臍水洗銀河費千斛滴成小蓓密於糝
亂走長條柔可束醉眸須及月下來破鼻試從風處觸
先生未必被花惱偶與門人莫春浴為憐壓架十萬枝

小立傍邊領新馥
剝揀好語寵瓊蕤
更掇清英釀醅醖
先生何得便杜門
霜鬢猶煩玉堂宿

酴醾歌

元華幼武

丹葩醉染猩猩血
素萼便娟比霜雪
呈妖逞艷豈足貴
含芳嗜潔誇清絕
荼蘼飽浥春雨膏
玲瓏剪刻英瓊瑤
千金麝腦和淑質
萬箇玉蝶紫柔條
坐看明月花梢上
便應題作清虛榜
醉眠花底不須歸
狼籍苔茵空撫掌
先生愛花何太濃
對花一飲揮千鍾
昔逢端伯稱韻友

我欲結好慚衰容莫教搖落西風後賈島留題傳不朽
憐君為作茶蘼歌多情又釀茶蘼酒

五言律

茶蘼

宋
陳與義

雨過無桃李惟餘雪覆牆青天映妙質白日照繁香影
動春微透花寒韻更長風流到尊酒猶得助詩狂

五言排律

次韻茶蘼

宋
黃庭堅

梅殘紅藥遲此物共春暉名字因壺酒風流付枕幃墜
鈿香徑艸飄雪淨垣衣玉氣晴虹發沈材鋸屑霏直知
多不厭可忍摘令稀常恨金沙學顰時正可揮

七言律

王主簿家醑醺

宋黃庭堅

肌膚冰雪生沈水百艸千花莫比方露濕何郎試湯餅
日烘荀令炷爐香風流徹骨成春酒夢寐宜人入枕囊
輸與能詩王主簿瑤臺影裏據繩牀

酴醾

宋 劉子翬

顛風急雨退花晨
翠葉銀苞照眼新
高架攀緣雖得地
長條盤屈總由人
橫釵數朶開猶小
撲酒餘香韻絕倫
唯有金沙顏色好
年年相伴殿殘春

酴醾

宋 楊萬里

以酒為名却謗他
冰為肌骨月為家
借令落盡仍香雪
且道開時是底花
白玉梢頭千點韻
綠雲堆裏一枝斜
休休莫斷西莊柳
放上松梢分外嘉

酴醾

宋 朱淑真

花神未許春歸去，故遣仙姿殿衆芳。
白玉體輕蟾魄瑩，素紗囊薄麝臍香。
夢回洛浦嬋娟影，閒記瑤臺淡淨粧。
勾引詩人清絕處，一枝和雨在東牆。

酴醾

金 劉仲尹

相看絕似好交友，著眼江梅季孟中。
海窟笙簫來鶴背，月林冰雪繞春風。
滿前玉蕊名尤重，特地梨花夢不同。
安得涪翁香一瓣，種成聊供小南豐。

茶蘼花開有懷同賞

明 陳憲章

看花何處發孤吟
牆角茶蘼又破金
紫焰照人今日態
香風吹夢隔年心
多情酒伴來何晚
得意遊蜂入每深
病起南窗坐終日
獨憐涓滴未成斟

五言絕句

茶蘼

宋 朱子

結援逐芳植
覆牆擁深翠
還當具春酒
與客花下醉

七言絕句

酴醾

宋韓維

平生為愛此香濃
仰面常迎落架風
每至春歸有遺恨
典型原在酒杯中

酴醾花

韓維

細蓓繁英次第開
攀條盡日未能回
不如醉卧春風底
時使清香拂面來

惜酴醾

韓維

天意再三珍雅艷
花中最後吐奇香
狂風莫掃殘英盡

留與佳人貯絳囊

絕句

宋 劉攽

明紅暗紫競芳菲
送盡東風不自知
占得餘香慰愁眼
百花無得似酴醾

茶蘼洞

宋 蘇軾

長憶故山寒食夜
野茶蘼發暗香來
分無素手簪羅髻
且折霜蕤浸玉醅

茶蘼

宋 張舜民

冰肥雪艷映殘春
燠日熏風入四鄰
任是主人能愛惜
也揀一半與遊人

酴醾花

宋黃庭堅

漢宮嬌額半塗黃
肌骨濃熏篤耨香
日色漸遲風力細
倚闌催舞白霓裳

披仙閣上觀酴醾

宋楊萬里

酴醾約我早來看
及至來看花已殘
動地寒風君莫怯
亂吹香雪灑闌干

失題

宋 戴復古

東風滿架索春饒三月梁園雪未消
賸馥何人炷蘭麝柔條無力帶瓊瑤

荼蘼

宋 方岳

山徑陰陰雨未乾春風已暖却成寒
不緣天氣渾無準要護荼蘼繼牡丹

酴醾

金 元好問

枕幃餘韻最清真夢裏猶來著
莫人擬借濃陰作羅幕

玉纓多處卧殘春

春深

元 劉秉忠

新染薔薇一撲黃梨花亂舞白霓裳憑誰收拾春風去
催發荼蘼滿架香

暮春寫懷

明 鎬 炳

青梅煮酒蕨芽肥倦客懷家入夢思想得故園風景好
一庭香雪落荼蘼

忽雨

明 張宇初

飄風急雨燕初泥
新竹成陰小閣西
數卷殘書香篆息
園花落盡到荼蘼

御定佩文齋詠物詩選卷三百四十六

欽定四庫全書薈要卷一萬八千九百六十九

集部

御定佩文齋詠物詩選卷三百四十七

凌霄花類

五言古

凌霄花

宋
梅堯臣

草木不解行隨生自有理觀此引蔓柔必憑高樹起氣
類固未合縈纏豈由已仰見蒼虬枝上發彤霞蕊層霄
不易凌樵斧者誰子

凌霄花

宋曾肇

凌波體纖柔枝葉工託麗青青亂松樹直幹遭蒙蔽不
有嚴霜威焉能辨堅脆

凌霄花

宋范浚

栽松待成陰種漆擬作器人皆笑艱拙往往後得利君
看植凌霄百尺蔓柔翠新花鬱煌煌照日吐妍媚風霜
忽搖落大木亦彫瘁視爾託根生枯莖無殘蒂先榮疾
蕭瑟物理固難恃凌霄亟芳華衰歇亦容易

七言絕句

凌霄花

宋楊繪

直饒枝幹凌霄去，猶有根源與地平。
不道花依他樹發，強攀紅日鬪鮮明。

為沈趣菴題畫

明偶桓

谿山深處野人居，小小簾櫳艸閣虛。
灑面松風吹夢醒，凌霄花落半牀書。

御定佩文齋詠物詩選卷三百四十七

欽定四庫全書薈要卷一萬八千九百七十

集部

御定佩文齋詠物詩選卷三百四十八

藤花類

五言古

詠藤

梁簡文帝

纖條寄喬木
弱影掣風斜
標春抽曉翠
出霧挂懸花

駕檐藤

唐儲光義

得從軒墀下
殊勝松柏林
生枝逐架遠
吐葉向門深
何

許答君子檐間朝暝陰

石上藤

唐岑參

石上生孤藤弱蔓依石長不逢高枝引未得凌空上何處堪託身為君長萬丈

潭上紫藤

唐李德裕

故鄉春欲盡一歲芳難再巖樹已青葱吾廬日堪愛幽蹊人未去芳艸行應礙遙憶紫藤垂繁陰照潭黛

挂樹藤

唐曹冠卿

本為獨立難寄彼高樹枝蔓衍數條遠溟濛千朶垂向日助成陰當風藉持危誰言柔可屈坐見蟠蛟螭

垂澗藤

宋朱子

寒泉下碧澗古木垂蒼藤蔭此萬里流閒花自層層何人賞幽致白髮巖中僧

菴畫谿

明馬愈

谿藤蕩微風谿水清見底照映青藤花搖搖不能已仙人紫綺裘嘯詠谿光裏慨彼塵俗心誰能此涓洗

朱藤

明吳寬

孌孌數尺藤往歲親手揀西菴敞短檐藉爾兩相夾歲
久終蔓延枝葉已交接有花散紅纓有子垂皂莢赤日
隔繁陰偃息可移榻但憂風雨甚高架一朝壓霜雪却
不妨忍冬共經臘

七言古

附長短句

愛敬寺古藤歌

唐李頎

古藤池水盤樹根左攫右拏龍虎蹲橫空直上相凌突

丰茸離纜若無骨風雷霹靂連黑枝人言其下藏蛟螭
空庭落葉乍開合十月苦寒常倒垂憶昨花飛滿空殿
密葉吹香飯僧遍南階雙桐一百尺相與年年老霜霰

和題藤架

唐獨孤及

尊尊葉成幄璀璨花落架花前離心苦愁至無日夜人
去藤花千里強藤花無主為誰芳相思歷亂何由盡春
日迢迢如線長

五言律

藤

唐李嶠

吐葉依松磴舒苗長石臺神農嘗藥罷質子寄書來色
映葡萄架花分竹葉杯金堤不見識玉潤幾重開

五言排律

和友人許棠題宣平里古藤

唐張蠊

欲結千年茂生來便近松
迸根通井潤交葉覆庭濃
厯代頻更主盤空漸變龍
畫風圓影亂宵雨細聲重
蓋密勝丹桂層危類遠峰
嫩條懸野鼠枯節叫秋蛩
翠老霜

難蝕皴多蘚乍封幾家遙共玩何寺不堪容客對忘離
榻僧看誤過鐘頃因陪預作終夕遶枝筇

七言律

紫藤花

明
王世貞

蒙茸一架自成林窈窕繁葩灼暮陰南國紅蕉將比貌
西陵青柏結同心裁霞綴綺光相亂剪雨縈煙態轉深
紫雪半庭長不掃閒拋簪組對清吟

藤

明
王士騏

手種藤花大可圍暮春小圃亦芳菲黃鸝隱葉惟聞囀
紫蝶尋香不辨飛滿架迎風光眩眼綠谿著雨碧侵衣
漫道破除情事盡長條柔蔓轉依依

五言絕句

紫藤樹

唐李白

紫藤挂雲木花蔓宜陽春密葉隱歌鳥香風留美人

古藤

唐錢起

引蔓出雲樹垂綸覆巢鶴幽人對酒時苔上閒花落

石上藤

唐顧况

空山無鳥跡何物如人意委曲結繩文離披艸書字

藤

明于若瀛

藤古結為梁蜿蜒憑雲霧步之時動搖疑駕彩虹度

七言絕句

送王永

唐劉商

綿衣似熱夾衣寒時景雖和春已闌誠知暫別那惆悵
明日藤花獨自看

宿楊家

唐
白居易

楊氏弟兄俱醉卧
披衣獨起下高齋
夜深不語中庭立
月照藤花影下階

紫藤

唐
許渾

綠蔓穠陰紫袖低
客來留坐小堂西
醉中掩瑟無人會
家近江南晝晷谿

題畫

明
沈周

臨水人家竹樹中
只因孤嶼水船通
當門細荇牽微浪

繞屋藤花落軟風

中甫過齋中烹茗清談試筆寫圖因題其上

明居節

落盡藤花澗水香
松風如水晝初長
幽人自是山中相
鶴氅黃冠坐夕陽

荆谿雜曲

明王叔承

女牆開徧白薔薇
羅葉藤花鳥亂飛
耐可銅官復離墨
滿城山色照人衣

和令則題畫

明陳繼儒

山邨雨霽水痕加
鴨嘴灘頭燕尾沙
新結松棚試新茗
好風無力掃藤花

御定佩文齋詠物詩選卷三百四十八

欽定四庫全書
會要卷一萬八千九百七十一
集部

御定佩文齋詠物詩選卷三百四十九

山丹花類

五言古

次韻子由所居

宋蘇軾

堂前種山丹錯落馬腦盤
堂後種秋菊碎金收辟寒
草木如有情慰此芳歲闌
幽人正獨樂不知行路難

山丹

宋朱子

昔遊嶺海間幾見蠻卉拆素英溥夕露朱鷗爛晴日歸
來今幾年晤對祇寒碧因君賦山丹悅復見顏色

七言律

山丹花

宋楊萬里

春去無芳可得尋山丹最晚出雲林柿紅一色明羅袖
金粉羣蟲集寶簪花似鹿葱還耐久葉如芍藥不多深
青泥瓦斛移山礪聊著書窗伴小吟

御定佩文齋詠物詩選卷三百四十九

欽定四庫全書薈要卷一萬八千九百七十二

集部

御定佩文齋詠物詩選卷三百五十

素馨花類

七言絕句

素馨花

宋
陳傅良

羞將姿媚隨花譜
愛伴孤高上月評
獨恨遇寒成弱植
色香殊不避梅兄

素馨花

明
楊慎

金碧佳人墮馬妝
鷓鴣林裏鬪芬芳
穿花貫纓盤香雪
曾把風流惱陸郎

夜至紅橋所居

明林鴻

素馨花發暗香飄
一朶斜簪近翠翹
寶馬歸來新月上
綠楊影裏倚紅橋

御定佩文齋詠物詩選卷三百五十

欽定四庫全書薈要卷一萬八千九百七十三

集部

御定佩文齋詠物詩選卷三百五十一

玉瓏鬆花類

七言律

往平縣西門郵亭廢園中有花名玉瓏鬆枝葉
與瓊花無異但花蕊層生與葉相間遠望如
翠煙籠玉幽香撲人遂呼濁醪痛飲花下陳
令取紙筆索詩乘醉走筆賦二律

明王蒙

誰司后土作花王
忍置瑤華官道旁
衣袂不經塵世染
夢魂猶帶廣寒香
孤蟾照破瓊林雪
飛蝶栖殘珠樹霜
天上人間惟有此
好將欄檻護荒涼

其二

何年碧海會瑤仙
雲製衣裳雪作鈿
醉鎖素虬纏寶樹
閒騎白鳳下瑤天
鶴林寺廢空流水
后土祠荒起暮煙
慚愧郵亭一株雪
春風猶得路人憐

七言絕句

遊天壇雜詩

金元好問

漫山白白與紅紅
小樹低叢看不供
總道揔花香氣好
就中偏愛玉龍鬆

原注花石
有玉龍鬆

御定佩文齋詠物詩選卷三百五十一

欽定四庫全書薈要卷一萬八千九百七十四

集部

御定佩文齋詠物詩選卷三百五十二

瓊花類

附瑤花

琪花

長短句

賦得瓊花觀送人

明
劉溥

瓊花觀在江都雲窻月館仙人居無雙亭前一方地昔
日瓊花今已無玉女香車游碧落回首人間塵漠漠重
攔空護八仙花飛珮誰乘九臯鶴古城楊柳接東橋十

里紅樓路不遙行舟過此一停泊琪樹陰中聽紫簫

七言律

約黃成之觀瓊花予不及從以詩代簡

宋方岳

杜宇聲中鬢欲華春風將綠又天涯
欠隨江夏無雙士共看揚州第一花
想像煙雲人跨鶴淋漓詩句字栖鴉
蹇驢不管唐衫濕醉兀歸鞍暮雨斜

五言絕句

揚州廣城店

明張以寧

潮落邗江夜先將夢到家揚州無賴月獨自照瓊花

七言絕句

小遊仙

唐曹唐

雲籠瓊花滿地香碧沙紅水遍朱堂外人欲壓長生籍
拜請飛瓊報玉皇

后土廟瓊花詩

宋王禹偁

春冰薄薄壓枝柯分與清香是月娥忽似暑天深澗底

老松擎雪白娑婆

揚州后土祠瓊花

元尹廷高

無雙亭下萬人看
欲覓殘英一片難
夜靜月明猿鶴唳
誤翻玉雪墮闌干

續遊仙詩

明馬洪

侍兒扶上紫鸞車
一笑相逢萼綠華
今夜蕪城好明月
無雙亭上看瓊花

附瑤花

七言古

瑤花

花白色而變
殘紅而碧

元郭鈺

瑤臺仙子初相見，迥立天風飄雪練。
東華夢破歸去遲，素衣總被緇塵染。
芳心不委春蝶狂，水晶簾捲凝清香。
胭脂洗紅留殘暈，海雲翦碧浮霓裳。
揚州瓊花舊同譜，零落誰知到南土。
聞君愛花最有情，亭臺五月清無暑。
君不見花開今日多有酒，不飲君如何。

附琪花

五言古

琪樹下因吟六韻呈先達者

唐劉駕

舉世愛嘉樹此樹何人識
清秋遠山意偶向亭際得
奇柯交若鬬生葉密如織
塵中尚青葱更想塵外色
所宜巢三鳥影入瑤池碧
移根豈無時一問紫煙客

五言絕句

初移琪樹

唐羊士諤

愛此丘中物煙霜盡日看
無窮碧雲意更助綠窗寒

石橋琪樹

唐僧隱丘

山上天將近人間路漸遙誰當雲裏見知欲度仙橋

七言絕句

步虛詞

唐陳羽

樓殿層層阿母家崑崙山頂駐紅霞笙歌出見穆天子
相引笑看琪樹花

欽定四庫全書

欽定詩物詩選
卷三百五十二

四

御定佩文齋詠物詩選卷三百五十二

欽定四庫全書薈要卷一萬八千九百七十五

集部

御定佩文齋詠物詩選卷三百五十三

蘭花類

五言古

幽蘭

宋鮑照

簾委蘭蕙露帳含桃李風攬帶昔何道坐令芳節終

紫蘭始萌

梁武帝

種蘭玉臺下氣暖蘭始萌芬芳與時發婉轉迎節生獨

使金翠嬌偏動紅綺情二遊何足懷一顧非傾城羞將
卷之侶豈畏鷄鳴

蘭

梁宣帝

折葉聊可佩入室自成芳
開花不競節含秀委微霜

賦新題得蘭生野徑

陳張正見

出蘭畹命酌動幽心鋤罷還開路歌喧自動琴
華燈六影落芳杜雜花深莫言閒徑裏遂不斷黃金

猗蘭操

隋辛德源

奏事傳青閣拂除乃陶嘉散條凝露彩含芳映日華已
知香若麝無怨直如麻不學芙蓉艸空作眼中花

蘭

唐王維

根移地因偏花老色未改意蘇瘴霧餘氣壓初寒外婆
娑靖節窗髣髴靈均佩

古意

唐賀蘭進明

崇蘭生澗底香氣滿幽林采采欲為贈何人是同心日
暮徒盈把徘徊憂思深慨然紉雜佩重奏丘中琴

贈友人

唐李白

蘭生不當戶別是閒庭艸
風被霜露欺紅榮已先老
謬接瑤華枝結根君王池
顧無馨香美叨沐清風吹
餘芳若可佩卒歲常相隨

詠蘭

唐白居易

寓常本殊致意幽非我情
吾常有疏淺外物無重輕
各言藝幽深彼美香素莖
豈為賞者說自保孤根生
易地無赤株麗土亦同榮
賞際林壑近汎餘煙露清
余懷既

鬱陶爾類徒縱橫妍媸苟不信寵辱何為驚貞隱諒無迹激時猶棟名幽叢靄綠畹豈必懷歸耕

蘭

唐
李德裕

楚客重蘭蓀遺芳今未歇葉抽清淺水花點暄妍節紫艷映渠鮮輕香含露潔

題楊次公春蘭

宋
蘇軾

春蘭如美人不採羞自獻時聞風露香蓬艾深不見丹青寫真色欲補離騷傳對之如靈均冠佩不敢燕

秋蘭已悴以其根歸學古

宋朱子

秋至百艸晦寂寞寒露滋蘭皋一以悴蕪穢不能治端
居念離索無以遺所思願言託孤根歲晏以為期

種蘭

宋薛季宣

蘭生林樾間清芬倍幽遠野人坐官曹茲意極不淺西
窓蔽斜日松欵架春晚牆陰蔭花木憔悴根日損植此
山國香坐與前事反扶疎可紉佩心緒端有本芽生僅
盈壇高風九成畹羣芳顏色好祇自誇園苑何如淡嚼

蠟艸莽曾誰混對我靜無言忘形如莽蓴

刈蘭

薛季宣

東畹刈真香靜院簪瓶水高遠不勝情時逐微風起和
雨剪閒庭誰作騷人語記得舊家山香來無覓處

盆蘭

元岑安卿

猗猗紫蘭花素秉巖穴趣移栽碧盆中似為香所誤吐
舌終不言畏此塵垢汙豈無高節士幽深共情素俛首
若有思清風颯庭戶

蘭花篇

明宋濂

陽和煦九畹晴芬溢青蘭潛姿發玄麝幽蕚凝紫檀綠
蘿託芳鄰白谷挹高寒元聖未成調相累久長歎葉施
雖外蔽貞潔終能完豈知生平心卒獲君子觀雜以青
瑤芝承以白玉盤靈風曉方薦清露夜初溥此時不見
知駢羅混荒菅春風桃花爛若霞綺攢徒媚夸毗子
千金買歌歡棄之不彼即要使中心安願結美人佩把
玩日忘餐

塘上聞蘭香

明葉子奇

大谷空無人芝蘭花自香
尋根竟不見芳草如人長

墨蘭

明僧宗衍

楚雪春已晴沅湘水初滿
去年故葉長今年新葉短
波明碧沙淨日照紫苔暖
不見澤中人江南暝雲斷

七言古

畫蘭

元吳鎮

迢迢風下東吳舟
坏土移入漳泉秋
初疑紫莖攢翠鳳

恍如綵綬紫青虬
猗猗九畹易消歇
奕奕百畝多淹留
軒窓相逢與一笑
交結三友成風流

采蘭堂

明僧妙聲

去年采蘭蘭葉長
今年采蘭蘭葉短
秉芳欲寄路漫漫
國香零落風吹斷
蓮花峰下采蘭堂
永懷佳境不能忘
上人開窓面山坐
山水含暉吟謝郎
三生誤落夫差國
翠結瓊琚香不息
目斷王孫猶未歸
江南春艸連天碧

五言律

芳蘭

唐太宗

春暉開禁苑
淑景媚蘭場
映庭含淺色
凝露泣浮光
日麗參差影
風傳輕重香
會須君子折
佩裏作芬芳

詠蘭

唐李嶠

虛室重招尋
忘言契斷金
英浮漢家酒
雪灑楚王琴
廣殿輕香發
高臺遠吹吟
河汾應擢秀
誰肯訪山陰

幽蘭

唐崔塗

幽植衆寧知
芬芳止暗持
自無君子佩
未是國香衰
白

露沾常早春風到每遲不知當路艸芬馥欲何為

蘭

唐僧無可

蘭色結春光氛氲掩衆芳過門階露葉尋澤逕連香
晚靜風吹亂亭秋雨引長靈均曾采擷紉佩掛荷裳

去歲蒙學古分惠蘭花清賞既歇復以根叢歸
之故畹而學古預有今歲之約近聞頗已著
花輒賦小詩以尋前約幸一笑

宋朱子

秋蘭遞初馥芳意滿沖襟想子空齋裏淒涼楚客心夕
風生遠思晨露灑中林頗意孤根在幽期得重尋

蘭

明馮琦

韋曲名園好習池勝事繁午風披蕙帶秋色上苔痕密
樹雲成幄疎籬水繞門不煩除客徑吾欲藉蘭蓀

七言律

蘭

宋楊萬里

雪徑偷開淺碧花冰根亂吐小紅芽生無桃李春風面

名可山林處士家政坐國香到朝市不容霜節老雲霞
江離蕙圃非吾耦付與騷人定等差

蘭

宋 劉克莊

深林不語抱幽貞賴有微風遞遠馨
開處何妨依薜砌折來未肯戀金瓶
孤高可挹供詩卷素淡堪移入卧屏
莫笑門無佳子弟數枝濯濯映階庭

掛蘭

元 謝宗可

江浦煙叢困草萊靈根從此謝栽培
移將楚畹千年恨

付與東風一縷開
湘女久無塵土夢
靈均元是棟梁材
午窓試讀離騷罷
却怪幽香天上來

蘭

明文徵明

靈根珍重自甌東
紺碧垂香玉兩叢
和露綯為湘水佩
凌風如到蕊珠宮
誰言別有幽貞在
我已相忘臭味中
老去相如才思減
臨窓欲賦不能工

題趙松雪墨蘭

明僧宗衍

湘江春日靜輝輝
蘭雪初消翡翠飛
拂石似鳴蒼玉佩

御風還著六銖衣
夜寒燕姑空多夢
歲晚王孫尚不歸
千載畫圖勞點綴
所思何處寄芳菲

五言絕句

蘭

唐
唐彥謙

謝庭漫芳艸
楚畹多綠莎
于馬忽相見
歲晏將如何

蘭

宋
司馬光

藝植日繁滋
芬芳時入座
青葱春如擢
皎潔秋英墮

蘭澗

宋
朱子

光風浮碧澗蘭杜日猗猗竟歲無人采含薰祇自知

蘭

宋楊萬里

健碧續續葉斑紅淺淺芳幽香空自秘風肯秘幽香

題信上人春蘭

元揭傒斯

深谷暖雲飛重巖花發時非因采樵者那得外人知

題畫蘭

元陳旅

九畹光風轉重巖墜露香紫宮祠太乙瑤席薦瓊芳

蘭

元鄭允端

並石疎花瘦臨風細葉長靈均清夢遠遺佩滿沅湘

寫蘭

明景翩翩

道是深林種還憐出谷香不因風力緊何以度瀟湘

七言絕句

蘭

宋朱子

漫種秋蘭四五莖疎簾底事太關情可能不作涼風計
護得幽香到晚清

寒食相將諸子遊程園

宋楊萬里

鹿葱舊種竹新栽
幽徑深行忘却回
忽有野香尋不得
蘭於石背一花開

題畫蘭

明文徵明

手培蘭蕙兩三栽
日暖風微次第開
坐久不知香在室
推窗時有蝶飛來

蘭

明余有丁

何處幽香撲酒樽
洲中杜若畹中蓀
紉來為佩裁為服
不許資施掛葦門

紫蘭

明
景翩翩

碧玉參差簇紫英當年剩有國香名
風前漫結幽人佩
澧浦春深寄未成

御定佩文齋詠物詩選卷三百五十三



總校官庶吉士臣侍朝

校對官檢討臣王坦修

謄錄監生臣李溥

謄錄監生臣張承恩